

**Z A K O N**  
**O FINANSIRANJU POLITIČKIH STRANAKA**  
**IZ BUDŽETA BRČKO DISTRIKTA**  
**BOSNE I HERCEGOVINE**

Na osnovu člana 23 Statuta Brčko distrikta Bosne i Hercegovine i Zakona o finansiranju političkih partija («Službeni glasnik Bosne i Hercegovine» broj 22/00) Skupština Brčko distrikta Bosne i Hercegovine, na 97. sjednici, održanoj 28. 07. 2004. godine, usvaja

**Z A K O N**  
**O FINANSIRANJU POLITIČKIH STRANAKA**  
**IZ BUDŽETA BRČKO DISTRIKTA BOSNE I HERCEGOVINE**

Član 1

Ovaj zakon reguliše način finansiranja političkih stranaka iz budžeta Brčko distrikta Bosne i Hercegovine (u daljnjem tekstu: Brčko distrikt).

Član 2

Političkim strankama, u smislu ovog zakona, smatraju se organizacije koje građani slobodno i dobrovoljno organizuju, a koje se u skladu sa zakonom registruju kod nadležnog suda u Bosni i Hercegovini u svrhu ispoljavanja političkih aktivnosti i ostvarivanja političkih ciljeva, a upisane u registar kancelarija političkih organizacija kod Osnovnog suda Brčko distrikta.

Član 3

1. Pravo na sredstva iz budžeta Brčko distrikta imaju političke stranke koje su ovjerene od Izborne komisije Bosne i Hercegovine za učešće na izborima za Skupštinu Brčko distrikta Bosne i Hercegovine.

2. Koalicija koja je od Izborne komisije Bosne i Hercegovine ovjerena za učešće na izborima za Skupštinu Brčko distrikta ima status političke stranke pri raspodjeli sredstava regulisanih ovim zakonom.

Član 4

Sredstva iz budžeta Brčko distrikta će se izdvajati za:

- 1) predizbornu kampanju političkih stranaka koje učestvuju na izborima za Skupštinu Brčko distrikta;
- 2) redovan rad političkih stranaka zastupljenih u Skupštini Brčko distrikta.

Član 5

Sredstva izdvojena za predizbornu kampanju političkih stranaka obezbjeđuju se u godini u kojoj se održavaju redovni izbori za Skupštinu Brčko distrikta i to u iznosu od 0,03 % prihoda u budžetu Brčko distrikta ili 60.000 KM zavisno od toga koji od ova dva iznosa je niži.

Član 6

Sredstva izdvojena za predizbornu kampanju političkih stranaka raspodjeljuju se na osnovu slijedećih principa:

- 1) Svaka politička stranka ima pravo na pokriće troškova predizborne kampanje nastalih tokom 2 mjeseca prije dana održavanja izbora, u maksimalnom iznosu od 4.000 KM;
- 2) U slučaju nedostatka sredstava iz tačke 1 ovog člana, postojeća sredstva će biti jednako raspodijeljena.

Član 7

Troškovi predizborne kampanje odnose se na sredstva utrošena za:

- 1) plakate, reklame, bilborde, letke,
- 2) organizovanje javnih skupova,
- 3) druge aktivnosti vezane za predizbornu kampanju.

Član 8

Sredstva izdvojena za redovan rad političkih stranaka po godišnjoj osnovi iznose 0,1% od prihoda u budžetu Brčko distrikta ili 200.000 KM, zavisno od toga koji od ova dva iznosa je niži.

### Član 9

Sredstva izdvojena za redovan rad političkih stranaka raspodjeljuju se na osnovu slijedećih principa:

- 1) 30% sredstava se raspodjeljuje u jednakim iznosima svim političkim strankama zastupljenim u Skupštini Brčko distrikta;
- 2) 50% sredstava se proporcionalno raspodjeljuje u skladu s brojem zastupničkih mjesta koje politička stranka ima u vrijeme raspodjele sredstava;
- 3) 20% sredstava se proporcionalno raspodjeljuje strankama opozicije u Skupštini Brčko distrikta, u skladu s brojem zastupničkih mjesta. Stranke opozicije, u smislu ovog zakona, su stranke koje učestvuju u radu Skupštine Brčko distrikta, ali ne pružaju podršku Vladi Brčko distrikta i čiji predstavnici nisu nosioci izvršne vlasti u organima Brčko distrikta. U slučaju da ovu kategoriju nije moguće izdvojiti, sredstva iz ove tačke dodaju se sredstvima iz tačke 2 ovog člana.

### Član 10

Sredstva za redovan rad političkih stranaka odnose se na troškove:

- 1) održavanja stalnih prostorija na teritoriji Brčko distrikta,
- 2) sprovođenja političkog istraživanja i analize političke strategije,
- 3) angažovanja u političkom obrazovanju i registraciji birača,
- 4) osnivanja fondacija i drugih organizacija koje unapređuju interese političke stranke,
- 5) zastupanja pred sudom u politički relevantnim sporovima,
- 6) promovisanja programa i ciljeva političke stranke u skladu sa zakonom.

### Član 11

Prijave za sredstva za predizbornu kampanju i redovan rad političkih stranaka podnose se Izornoj komisiji Brčko distrikta.

### Član 12

Raspodjelu sredstava na način iz člana 6 i člana 9 ovog zakona obavlja Odjeljenje za budžet i finansije Vlade Brčko distrikta, na osnovu podataka koje im dostavi Izborna komisija Brčko distrikta.

### Član 13

Kontrolu finansiranja i korištenja sredstava za predizbornu kampanju i redovan rad političkih stranaka vrši Izborna komisija Bosne i Hercegovine u skladu sa Zakonom o finansiranju političkih partija («Službeni glasnik BiH» broj 22/00), Izbornim zakonom Bosne i Hercegovine («Službeni glasnik BiH» brojevi 23/01, 7/02, 9/02, 20/02, 25/02 i 20/04).

### Član 14

1. Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».
2. Članovi 8 i 9 ovog zakona primjenjivat će se od 01. januara 2005. godine.

Босна и Херцеговина  
**БРЧКО ДИСТРИКТ**  
**БОСНЕ И ХЕРЦЕГОВИНЕ**  
 СКУПШТИНА БРЧКО ДИСТРИКТА

Bosna i Hercegovina  
**BRČKO DISTRIKT**  
**BOSNE I HERCEGOVINE**  
 SKUPŠTINA BRČKO DISTRIKTA

Broj: 0-02-022-246/04  
 Brčko, 28. juli 2004. godine

PREDSJEDNIK  
 SKUPŠTINE BRČKO DISTRIKTA  
**Mirsad Đapo, dipl. pravnik**

This document was created with Win2PDF available at <http://www.daneprairie.com>.  
The unregistered version of Win2PDF is for evaluation or non-commercial use only.